



Inatsisartunut ilaasortaq
Vivian Motzfeldt
Siumut

**Eqikkakkamik ilinniarnertuunngorniartarneq pillugu § 37 malillugu immikkoortoq
44-mut akissut**

18-02-2016
Sagsnr. 2016-2489
Dok. nr. 2170887

Postboks 1029
3900 Nuuk
Tlf: +299 34 50 00
Fax: +299 32 20 73
Email: ikiin@nanoq.gl
www.nanoq.gl

Inatsisartunut ilaasortaq Vivian Motzfeldtimut. Inatsisartut suleriaasissaanni § 37-mi
imm. 1 malillugu *Eqikkakkamik ilinniarnertuunngorniartarneq* pillugu
apeqquteqaateqarputit (udd#185021).

- 1. Avannaata Ilinniarnertuunngorniartarneq ukiumut ataatsimut eqikkakkamik
ilinniarnertuunngorniartarneq (GU-pilot) siunertai suuppat?**

Akissut:

Eqikkakkamik ilinniarnertuunngorniartarneq inersimasunut 23-t sinnerlugit ukiulinnut
ukiuni pingasuni inuussutissarsiuinik misilittagaqarlutik uppersaatissalinnut
sammisitaavoq. Siunertaasimavoq pikkorissarnermik naammassinnittut
ilinniartitaanernut ingerlaqqiffiusunut immikkuullarillutik sivikitsunut siviuserusunullu
taamaalereeraangamik qinnuteqartarsinnaalernissaat.

- 2. Ilinniarnertuutut eqikkakkamik ukiup ataatsip iluani naammassinnissima-
sup ukiuni pingasuni ilinniarnertuunngorniarsimasutut ilinniakkani
ingerlariaqqiffinnut atorsinnaassavaa?**

Akissut:

Naamik *Eqikkakkamik ilinniarnertuunngorniartarneq* piffissaq eqqarsaatigalugu ukiumik
ataatsimik siviussuseqartarpoq kisiannili ilinniarnertuutut taannaannaalluni
eqikkakkamik soraarummiissutaasimangisaannarluni. Pikkorissartitsineq
ilinniagassanik katitigaasarsimavoq pikkorissaqataasunut ilinniartitaanernut
aalajangersimasunut qinnuteqarsinnaalersitsisoq. Ukiuni pingasuni ingerlasarneq
naliginnaasumik ilinniagaqalernissamut piareersarfiusarpoq, taamaaliornikkut
pikkorissaqataasut ilinniartitaanernut ingerlaqqiffiusunut qinnuteqarnissamut
tunngatillugu amerlanerungaartunik periarfissaqalertarlutik.

- 3. Taamaangippat qanoq sunalu siunertaralugu eqikkakkamik
ilinniarnertuunngorniartarneq pilersinneqarsimava?**

Akissut:

Ukiumut ataatsimut siviussusiligaanera isumaqarpoq ilinniagassat

ilinniarnertuunngorniarmitt neqeroortigineqartut ikittuinnaasartut. Aaqquissuussinikkut siunertaasimavoq inersimasut 23-t sinnerlugit ukiullit, ilinniartitaanerni ingerlaqqiffiusuni sivikitsuni sivisunerusunilu eqqarsaatigineqartuni siunnerfilimmik sulisimanerminnut uppersaasinnaasut ilinniartitaalerinissaminnut periarfissinneqartarnissaat. Tassa imaappoq ilinniagassat tulliuullugu pisortat suliffeqarfiini suliffiulersussani qinnuteqaatiginissaannut naammassisimagaangata. Taamaallit pikkorissaqataasut suliassaqarfimmut siusinnerusukkut ilinniagaqanngitsut suliffigisimasaminnut eqqortumik ilinniagaqalersinnaassapput. Assersuutigineqassaaq ataaseq timelæreritut sulisimasoq kingornatigullu ilinniartitsisut ilinniagaqalersimalluni.

4. Ilinniarfimmut ingerlariaqqiffiusunut sorlernut naapertuuppa, atorineqarsinnaava?

Akissut:

*Eqikkakkamik ilinniarnertuunngorniarneq taannaannaalluni ilinniartitaanernut ingerlaqqiffiusunut qularutissaanngitsumik isissutaasinnaangilaq, kisiannili tiguneqarsinnaalluni qinnuteqaateqarnermut tunngavissiiisuulluni, pikkorissartitaanermi angusat apeqqutaallutik. Ingerlariaqqiffiusumik ilinniartitaanermut tiguneqarnissaq pisortat suliffeqarfiutaanni tiguisissami pineqartumi aalajangiivigineqartarpoq. Eqikkakkamik ilinniarnertuunngorniarnertut ilinniartitaanerit ingerlaqqiffiusut ukununga sammisitaasimapput: *ilinniartitsisunngorniarnertut, inunnik isumaginninnermi siunnersortinngorniarnertut, inunnik isumaginninnermi perorsaasunngorniarnertut, napparsimasunik paarsisunngorniarnertut aamma tusagassiortunngorniarnertut ilinniartitaanerit.**

Ilisimatusarfik nalunaaruteqarpoq Eqikkakkamik ilinniarnertuunngorniarnertut 2017-imi aasamiit tassani ilinniartitaanernik neqeroortigineqartartunik qinnuteqartitsinissamut tunngavissaarutissasoq. Ilisimatusarfimmi ilinniartitaanerit neqeroortigineqartut pingaartumik piimaneqarnerusarsimmata, taamatuttaaq pingaartumik siusinnerusukkut Ilinniarfissuarmi Institut for Læring pikkorissartitsisarnerup ataannarnissaanut tunngavissaaruppoq. Taamaattoq suli immikkut akuerineqarluni tiguneqarnissaq qinnuteqaatigineqarsinnaavoq.

Eqikkakkamik ilinniarnertuunngorniarnertut ukununga suli qinnuteqarfigineqarsinnaavoq: akademi-uddannelse, serviceøkonom, arktisk turistguide aamma procestekniker.

Inussiarnersumik Inuulluaqqusillunga



Nivi Olsen



SIUMUT
INATSISARTUT

Qaqortoq 4. februar 2016

Inatsisartut suleriaasiat § 37 naapertorlugu matumuuna Naalackersuisunut apeqqutit imaattut saq-qummiuppakka:

- 1. Avannaata Ilinniarnertuunngorniarfiani ukiumut ataatsimut eqikkakkamik ilinniarnertuunngorniartarnerup (GU-pilot) siunertai suuppat?**
- 2. Ilinniarnertuutut eqikkakkamik ukiup ataatsip iluani naammassinnissimasup ukiuni pingasuni ilinniarnertuunngorniarimasutut ilinniakkani ingerlariaqqiffinnut atorsinnaassavaa?**
- 3. Taamaangippat qanoq sunalu siunertaralugu eqikkakkamik ilinniarnertuunngorniartarneq pilersinneqarsimava?**
- 4. Ilinniarfinnut ingerlariaqqiffiusunut sorlernut naapertuuppa, atorneqarsinnaava?**

(inatsisartunut ilaasortaq Vivian Motzfeldt - Siumut)

Tunngavilersuutit:

Avannaani eqikkakkamik ilinniarnertuunngorniat ilinniakkaminnik aallartikkamik ilarpassuisa siunerfigisimasaraluartik piviusunngortissinnaajunnaassallugu erummatigaat.

Qulaani apeqqutigisakka erumassutaanut aallaaviupput, Ilimmarfiup ataani ilinniarneqarsinnaasut arlallit ungasinngitsumi suaarutigineqarput iserniarnermi piumasagaatit qaffanneqassasut. Uanilu apeqqutigisanni paaserusuppara eqikkakkamik ilinniarnertuunngorsimasut soorlu assersuutigalugu ilinniartitsisunngorniatut imaluunniit socialrådgiverinngorniatut ingerlariaqqinnissaminnut ilinnigartik atorsinnaaneraat. Amerlaqaat sineriammi najugaqartut nunarput qimannagu nunattalu inui sullikkusullugit ilinniakkaminnik aallartitsisartut.

Ilinniakkanik qaffassaaneq pingaaruteqaqaaq, taamaammallu aamma ilinniakkat ingerlariaqqiffiusut tamarmik siunertaqartumik ingerlanneqarnissaat pingaarluinnarpoq. Eqikkakkamik ilinniarnertuunngorniartarneq ilinniakkanut ingerlariaqqiffiusunut atorneqarsinnaangippat suna peqqutigalugu pilersinneqarsimanera paaserusunnarpoq.